

En memoria da Florian Monn – Wyss, Selva, 1927 – 2013



Florian Monn ei naschius ils 17 d'uost 1927 sco quart da siat fargliuns, dus frars e quarter soras, sco feagl da Gion Antoni e Sabina Monn - Venzin a Rueras. Il Florian, (sco el vegneva numnaus dils ses muort il lungatg tudestg, en Tujetsch enconuschev'ins il Flurin dil fravi pign) ha passentau las scolas en Tujetsch. Suenter las scolas obligatoricas ei il giuven staus en piazza tier in pur ella Bassa e pli tard ha el frequentau igl emprendissadi da cuschinier e luvrau a Basilea el

schinumnu «Schützenhaus» e lu eis el staus duront 1 onn e miez sil bastiment e puspei turnaus a Basilea (Binningen) e luvrau sco cuschinier.

Igl onn 1956 ha il Florian menau sia spusa Paula Wyss avon gl'altar. Da lur lètg ein duas buobas e dus buobs sorti, la luschezia dils premurai geniturs. Igl onn 1966 ei la famiglia Monn secasada a Domat nua ch'ìl Florian ei staus cau cuschinier dalla cantina dalla fabrica da Domat. Leu ha el sco era sia dunna luvrau tochen igl onn 1984. Gliez onn ein ils conjugals vegni en Tujetsch e habitau a Selva en la habitaziun suren ed igl onn 1992 han els cumprau la casa nua ch'els sesentevan bein da casa e nua che la Paula viva aunc oz.

Ses hobis preferi eran la catscha ed il cavar cristallas. Igl onn 1957 ha il Florian fatg igl examen da catscha ed el era vegnius cun in sempel «Puch» naven da Binningen viers Mustér. Ils emprems onns eis el ius mo a catscha aulta e quei strusch gl'entir temps e pli tard (naven da Domat) eis el vegnius sin catscha da laghetg e pli tard era la catscha bassa bunamein per el la pli principala ed el ha passentau biaras e bialas uras cun ses tgauns da catscha bassa ed era cun differents catschadurs da Tujetsch. Il Florian era in catschadur da vaglia ed el teneva ault la catscha da patenta Grischuna. El deva honor al patrun dils catschadurs, sogn Hubert, haveva il duui respect viers la selvaschina, ha visitau pli

baul numerus tirs da catscha cun buns resultats e persequitava activamein las differentas radunonzas da catscha e quei adina en vestgiu da catschadur da nui. Era eis el staus in dils emprems catschadurs da capricorns dall'uniun Badus ed igl onn 1988 ha el giu la quida da sittar in buc capricorn capital. Il territori preferiu da catscha dil Florian era Selva e contuorn ed igl onn 2001 ha el sentiu ch'il flad mava pli vess e la vegliadetgna ha dau d'entellir da calar dad ir a catscha.

Il trapassau ei entraus igl onn 1957 ell'Uniun da catschadurs Badus ed ei staus commember da tala tochen sia mort. Igl onn 1987 ei Florian daven-taus commember veteran ed igl onn 1997 commember liber dall'Uniun Badus e dil BKPJV.

Il Florian ei era staus in premurau cava cristallas ed oravontut ils onns da pensiun nua ch'el ei secasaus a Selva mava el stedi en Cavradi ed el ei vegnius a casa cun biaras e bialas cristallas e quei vesev'ins gia dalunsch cura ch'el vegneva la sera a casa. Sia collecziun da talas dat-tan perdetga dils grondius scazis ch'el ha purtau ord Cavradi. Duas ga ha il trapassau giu in accident durant la lavur vid siu hoby e tals han senz'auter sclavinau empauet sia natira d'in um sc'in cuolm. Il Florian ha denton giu cletg ed ei mintga ga serevegnius stupent e turnaus enta Cavradi.

Il Florian ei staus biars onns caluster a Selva ed el era in fervent veneratur da Nossadunna.

Igl onn 2008 el meins zercladur ha il Florian giu in'attacca dil cor e suenter in temps da convalescenza a Valens eis el vegnius transportaus en la casa da tgira a Mustér, nua ch'el ha passentau ils davos onns dal-la sera cun empauet semudergiar, denton adina puspei cun sefar si ed haver la speranza da saver viver in tempset. Grond plascher haveva el dallas numerusas visetas da parents ed enconuschents ed oravontut dils 9 biadis e 4 subbiadis.

Da Pastgas ha il trapassau giu malcostas ed ha buca pli pudiu serevegnir ed ils 28 da matg ha el rendiu si'olma al Scaffider, suenter haver priu cumiau dils ses. Pils ses da casa sco era per tuts amitgs ed enconuschents ha siu cumiau muntau dolor e tristezia. Ils 5 da zercladur ha in pievelun priu cumiau dil Florian e la gruppa da corns Badus ha sunau dus tocs da cumiau per siu meriteivel commember defunct. Oravontut il toc sin santeri «Ich hab einen Kameraden» han svegliau tristezia ed encarscha-

detgna, ein gie biaras e nunemblideivlas uras da catscha da miu bien amitg vegnidas memorisadas.

Car Florian, nus vegnin a salvar Tei en buna memoria. Ruaussa en pasch!

Tiu amitg da catscha Norbert Vinzens

Die Trauerfamilie möchte einen herzlichen Dank aussprechen:

- der Belegschaft Center da sanadad Sursassiala in Disentis für die gute Betreuung
- Dr. Fischbacher, Dr. Lechmann und Dr. Huonder und dem Spital Ilanz
- Herrn Pfarrer, Giusep Cathomas, für die eindrückliche und persönliche Gestaltung der kirchlichen Abschiedsfeier sowie allen, die den Gottesdienst mitgestaltet haben
- Den Jagdhornbläsern und dem Jägerverein Badus für den schönen Kranz
- allen, die Florian in seinem Leben mit Liebe und Freundschaft begegnet sind und Abschied genommen haben, sowie für die vielen mündlichen und schriftlichen Zeichen des Mitgeföhls